



Narsaq 20. august 2015
UKA2015/112

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Savaatillit nersutaatillillu inuussutissarsiuteqarnerannut nanoqartalenera qanoq annertutigisumik ajornartorsiutaalersimanera, tamatumanilu tamatuma qanoq iliuseqarfigineqarsinnaanera pillugu Naalackersuisut misissuisitsissasut Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit ataqatigiit)

Siunnersuut saqqummiussassara takisuumik nassuiarujussuartaqarunangilaq savaatillit namminneq inuussutissarsiummi nersutaatinillu nakkutiginninnerminni misilittagari- lersimasaasa namminneq takussutissereermassuk. Pisartullu ilungersunartut takutippaat savaateqarfiit arlallit qeqqanni nannumik naammattoorsisoqartillugu maleruagassat malillugit nanoq qimaatinniarlugu ungoorniagassaasoq.

Maleruagassat savaatillit ilaqutaannut inuussutissarsiutaannullu innarleerujussuarsinnaasoq nalunangilaq. Nunap timaani inuussutissarsiutit napassutai savat angallapput, nannullu ima nunatta kujataani takussaalertigipput allaat tiffaseqisuni naammattuugassaajualerlutik. Savat inaat savaqartillugu allatulluunniit uumasuutit arlallit innarlerneqassagaluarpata inuussutis- sarsiut toqqaannartumik eqqugaasussaavoq.

Isumaqarnarpoq piffissaq apeqqutaaginnartuq nannut savaateqarfiit akornanni pinartoqar- titseratarsinnaanerat, maleruagassammi nunatsinni sumiiffinni allani naleqqukkaluartut savaatillit ilungersunartumik eqqorneqatigisaleraat malunnarsivoq. Taamaammat pisariaqarpoq peqqussutigissallugu ajornartorsiutaalersimasoq tamanna Naalackersuisunit eqqumaffigineqa- lissasoq - qanoq iliuseqarfigineqarsinnaanera aamma ilanngullugu.

Pisut ilungersunartut pinartuusinnaasullu sianeqattaarluni akuerineqarnissamik qinnuteqar- niarnermi ajortumik savaatilimmullu eqquinerluttumik pisoqapallassinnaanera savaatillit ataatsimeersuarnerminni aamma qaqqimassuk tupinnartuunngilaq. Ukiuni kingullerni pisut ilaat savaatillit misigisalerpaat, maleruagassat malillugit nammineq savaateqarfimminniit savaateqarfiup tullianut ingerlatinniaannartariaqartarlugu. Tamanna akuerineqarsinnaan- ngilluinnarpoq.

Neriullunga ataatsimut suleqatigiilluta savaateqarfiit nanorsiortoqartillugu illersorneqarsin- naanerat nukittorsarneqassasoq. Siunnersuutigaaara nannut ajuissortumik misillerfigineqar- nissaat utaqqinagu naalackersuinikkut aaqqitassat suliarineqarnissaat. Alloriarneq siulleq tassaasariaqarpoq taaneqareersutut misissuisitsinissaq, taanna tunngavigalugu ajornartorsiu- taalersimasoq qanoq anigorniarneqassanersoq tunngavissalimmik politikkikkut isummorsor- figisinnaaniassagatsigu, aamma inuussutissarsiummut iluaqutaasumik.

Taamatullu naatsumik tunngavilersuuteqarlunga siunnersuut Inatsisartunut isummerfigisas-sanngartippara.

Pisortanut aningaasatigut allaffissornikkullu kingunerisassat.

Misissuisitsinerup ingerlanneqarnera atorfilittap ukiup affaanik sivilunerunngitsumik sulisineqartumik naammassineqarsinnaasoq ilimagineqarpoq (250.000 kr). Taamatut naliliinermut tunngaviuvoq ajornartorsiut qanoq annertutiginersoq paasisaqarfigissallugu pisariitsuarsuus-sammat, tassami Aalisarnermut, Piniarnermut Nunalerinermullu Naalakkersuisoqarfimmut nalunaarutigineqartartut tunngavigineqassapput - kiisalu Nunalerinermut Siunnersorteqarfik aammalu Savaatillit Peqatigiit Suleqatigiissut (SPS) oqaloqatigineqassallutik.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Soqanngilaq.

Innuttaasunut aningaasatigut allaffissornikkullu kingunerisassat.

Soqanngilaq